

## قلبي يا عاشق

قلبي يا عاشق ملهوف      عايز تهرَب قوللي لفين  
الحُب عُمره ماكان معروف      إلا بشوق ما بين قلبين  
مشيت في طريق نهايته سراب      وعشت سنين بأمل كذاب  
واللي افكرتهم احباب      غدروا وباعوا ف غمضة عين

### قلبي يا عاشق ملهوف عايز تهرَب قوللي لفين

صَحَّيتني ليه من الأحلام      وقولتلي قوم بسرعه قوام  
نجري ونهرَب م الأيام      قبل النار ماتبقى نارين  
سمعت كلامك وكان قَدري      ارجع مكسور سنين عُمري  
اتاريني بنزف وف دمِّي      حنين لذكرى حُب سنين

### قلبي يا عاشق ملهوف عايز تهرَب قوللي لفين

بتقول يا قلبي خلاص فاض بيك      خلَّيتني ابكي بحرقه عليك  
عُلبت وياما باحاييل فيك      إبعِد دول مش مضمونين  
رضيت بذل ليه وهوان      حاتعيش لإمتي حزين حيران  
ياريتك ترجع زي زمان      خالي البال لوحتي يومين

### قلبي يا عاشق ملهوف عايز تهرَب قوللي لفين